

## **Gemauschels téscht Berlin a Paräis: Ass dat d'europäesch Zukunft?**

*Pressematdeeling vum 4. Juli 2019*

Esouguer iwwerzeegten Europäer wäerten eng Kéier musse schlécken. De Posteschacher ëm d'europäesch Spëtzepositionen ass eriwwer, an d'Resultat ass bedenklech. Fir d'ADR ass dorunner just positiv, datt heimat d'Iddi vun europäesche Spëtzekandidate gestuerwen ass, wéi de Nach-Kommissiounspräsident Jean-Claude Juncker selwer zouginn huet. Et war dat en Usaz fir der EU nach méi Muecht a méi Souveränitéit ze ginn, duerch Politiker, déi duerch europäesch Parteiallianze solle legitiméiert ginn. Deen Usaz ass mat der aktueller Besetzung vu Bréisseler Spëtzeposten feelgeschloen, an suergt bis an d'Europaparlament era fir Frustratioun.

Wann awer d'Nominatioun vun Ursula von der Leyen a Christine Lagarde d'Zukunft vun europäesche Verhandlungse weisen, däerf ee sech Suerge maachen. Berlin a Paräis plazéieren ongenéiert zwee Politiker, deenen hir Karriären net ëmmer glécklech verlaf sinn. A béid haten an de leschte Joren mat Skandalen a mat der Justiz ze dinn.

Op der Streck bleiwe virun allem méi kleng Länner, deenen hir Meenung an Europa ëmmer manner zielt. Dee selwer ernannte Féierungsduo an Europa baut op seng wirtschaftlech Bedeitung fir ze soen, wat ze geschéien huet. Groussbritannien, dat ëmmer als gesond Géigegewicht funktionéiert huet, ass nëmme nach op Sursis an der EU ... och well et d'Marschrichtung vun deenen zwee anere Länner net méi wollt matdroen.

D'ADR widderhëllt och hir Oppositioun zu transnationale Lëschten an zu Direktwalen fir europäesch exekutiv Mandater, esou wéi den Här Premierminister Bettel se elo nees an d'Spill bruecht huet. D'Äntwert op déi déif Krisen vun an an der Europäescher Unioun kann net "ëmmer méi Europa" heeschen, mee muss an enger Stabiliséierung a Konsolidéierung vun der europäescher Zesummenaarbecht am Kader vun engem Europa vun den Natiounen bestoen.

Déi Personaldecisiounen, déi elo geholl goufen, sinn net nëmme e Resultat vun deem déiwe Mësstrauen téschent den europäesche Staaten, mä riskéieren och nach d'Spannungen an deene nächste Joren weider ze verdéiwen.

Ëmmer méi Europa heescht an Zukunft ëmmer méi Berlin a Paräis. An dat kann net gutt sinn, weder bausse- nach verdedegungspolitesch nach, wat d'EU-Finzen ugeet, fir nëmme déi ze nennen.